

Na osnovu člana 15. Zakona o principima lokalne samouprave Federacije Bosne i Hercegovine ("Službene novine Federacije BiH", broj 49/06 i 51/09), člana 71. stav 2. tačka 1. Statuta Općine Vogošća, prečišćeni tekst ("Službene novine Kantona Sarajevo", broj: 27/14 - Prečišćeni tekst, 14/15 i 9/20) Općinski načelnik d o n o s i:

PRAVILNIK

o stipendiranju učenika i studenata sportista sa područja Općine Vogošća

I OSNOVNE ODREDBE

Član 1.

Ovim pravilnikom utvrđuju se osnove, način i kriteriji stipendiranja učenika i studenata koji postižu vrhunske sportske rezultate na takmičenjima, a imaju prebivalište na području općine Vogošća i nastupaju za klub registrovan na području općine Vogošća (u daljem tekstu Općina).

Član 2.

Općina će u toku jedne godine dodijeljivati sportske stipendije za učenike i studente koji postignu vrhunske sportske rezultate na međunarodnim takmičenjima (u daljem tekstu učenici/studenti sportisti).

Sredstva za stipendiranje učenika/studenata sportista obezbijavaju se u Budžetu Općine.

II DODJELA

Član 3.

Stipendije se dodjeljuju na osnovu ostvarenog rezultata učenik/student sportista Općine Vogošća. Svi osvajači medalja definisanih ovim pravilnikom se obraćaju Općini sa zahtjevom za dodjelu stipendije a rezultat dokazuju diplomom ili odličjem i potvrdom strukovnog saveza da je rezultat vrhunskog karaktera definisanog ovim Pravilnikom.

III PRAVO UČEŠĆA NA KONKURSU

Član 4.

Pravo učešća na konkursu za dodjelu stipendija ima učenik/student sportista koji ispunjava sljedeće uslove:

- da je državljanin BiH,
- da ima prebivalište na području Općine najmanje tri godine prije ostvarivanja rezultata,
- da ima navršenih 9 godina,
- da nema navršenih 18 godina,
- da je takmičar u kontinuitetu najmanje tri godine,
- da je član kluba koji je registrovan za takmičenje u matičnom sportskom savezu Bosne i Hercegovine.

Pravo na dodjelu stipendija ima učenik/student koji prima stipendiju po drugom osnovu.

IV PRIJAVA ZA DODJELU STIPENDIJE

Član 5.

Učenici/studenti sportisti podnose prijavu za dodjelu stipendije nakon ostvarenog rezultata. Uz prijavu je potrebno priložiti sljedeće dokumente:

- prijavu za dodjelu stipendije sa tačnom adresom, kontakt telefonom i ostalim kraćim podacima,
- potvrda o redovnom školovanju,
- izvod iz matične knjige rođenih,
- uvjerenje o državljanstvu,
- uvjerenje o kretanju ne starije od 30 dana,

- ovjerenu kopiju takmičarske knjižice ili drugi dokument koji potvrđuje takmičarski status,
- potvrdu matičnog sportskog saveza o postignutom sportskom rezultatu podnosioca prijave,
- dokaz o ostvarenom rezultatu sa zvaničnog takmičenja priznatog od svjetskih i evropskih strukovnih federacija federacija.

Dokumenti se prilažu u originalu ili ovjerenoj kopiji ne stariji od 3 mjeseca.

V KRITERIJI ZA DODJELU STIPENDIJE

Član 6.

Kriteriji za dodjelu stipendija vrši se na osnovu ostvarenih sportskih rezultata u pojedinačnoj i ekipnoj konkurenciji na međunarodnim takmičenjima priznatim od svjetskih i evropskih federacija, a vrednuju se aktuelni rezultati, i to:

- osvojeno 1, 2. i 3. mjesto na Olimpijskim i Paraolimpijskim igrama, Svjetskim prvenstvima i kupovima, Evropskim prvenstvima i kupovima, Evropskim i Mediteranskim igrama, Balkanskim prvenstvima,
- osvojeno 1, 2. i 3. mjesto na međunarodnim sportskim takmičenjima gdje je učestvovalo minimalno 25 država a ista se nalaze u kalendaru takmičenja svjetske ili evropske federacije,

Ostvareni rezultat se dokazuje diplomom ili odličjem i potvrdom o ostvarenom rezultatu koju izdaje matični sportski savez kod kojeg je kandidat registrovan za takmičenje.

VI NOVČANI IZNOSI STIPENDIJE

Član 7.

RANG TAKMIČENJA	POJEDINAČNA TAKMIČENJA			EKIPNA TAKMIČENJA		
	I MJESTO	II MJESTO	III MJESTO	I MJESTO	II MJESTO	III MJESTO
Olimpijske i paraolimpijske igre	10.000	9.500	9.000	9.000	8.500	8.000
Svjetsko prvenstvo	8.000	7.500	7.000	7.000	6.500	6.000
Evropsko prvenstvo	6.000	5.500	5.000	5.000	4.500	4.000
Svjetski kup ili liga mladih	4.000	3.500	3.000	3.000	2.500	2.000
Evropski kup ili liga mladih	2.000	1.750	1.500	1.500	1.250	1.000
Mediteranske igre	1.000	750	500	500	400	300
Balkansko prvenstvo	500	400	300	300	200	100
Međunarodni turnir 25 država učesnica	300	250	200	200	150	100

VII POSTUPAK DODJELE STIPENDIJA

Član 8.

Zahtjev za dodjelu stipendije se može podnijeti najkasnije 60 dana nakon ostvarivanja vrhunskog rezultata definisanog ovim pravilnikom. Osvajač odličja zahtjev predaju na protokol Općine Vogošća Službi za privredu, integrisani lokalni razvoj i društvene djelatnosti. Po okončanju procedure provjere rezultata Općinski načelnik odlukom dodjeljuje godišnju stipendiju za osvajača odličja u iznosima iz člana 7. Pravilnika te potpisuje ugovor s korisnikom stipendije. Ukoliko je korisnik stipendije maloljetan, u njegovo ime ugovor potpisuje zakonski zastupnik (roditelj ili staratelj) uz supotpis maloljetnog korisnika stipendije.

VII PRAVA I OBAVEZE KORISNIKA I DAVAOCA STIPENDIJE

Član 9.

Stipendija se dodjeljuje za ostvaren vrhunski rezultat a isplaćuje se jednokratno u iznosima iz člana 7. Pravilnika iz budžeta Općine.

Član 10.

Korisniku stipendije koji je potpisnik ugovora o stipendiranju dužan je u roku od 30 dana izvršiti povrat sredstva stipendije ukoliko napusti školovanje ili promijeni mjesto prebivališta.

VIII PRELAZNE I ZAVRŠNE ODREDBE

Član 11.

Terminološka upotreba muškog ili ženskog gramatičkog roda u Pravilniku podrazumijeva uključivanje oba spola.

Član 12.

Ovaj Pravilnik stupa na snagu danom objavljivanja na Oglasnoj ploči ili web stranici Općine Vogošća.

Broj: 03-36-1803/22
Vogošća, 02.11.2022. godine



OPĆINSKI NAČELNIK

Edin Smajić